

Uunga siunnersuut: Efterskolit aamma paarlaasseqatigiittarnermut tapiissutit pillugit Inatsisartut inatsisaata allanngortinnissaa pillugu Inatsisartut inatsisaat
(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit efterskolit aamma paarlaasseqatigiittarnermut tapiissutit pillugit Inatsisartut inatsisaata allanngortinnissaa pillugu Inatsisartut inatsisissaattut siunnersuut matumuuna saqqummiuppara.

Siunnersuut Savalimmiuni efterskolernermut aamma Danmarkimi fagskolini namminersortuniinnermut tapiissuteqarsinnaanerit inatsisitigut tunngaviinik pilersitsinissaq siunertaavoq.

Inuusuttut Nunani Avannarlerni efterskoleriarsinnaanissaannut, eqaannerusumik aamma suleqatigiinnissamut aqqissugaanermut alloriarneq siullertut siunnersuutigineqarpoq Savalimmiunut efterskoleriarnissamut tapiissuteqartoqarsinnaaneq.

UPA 2024-mi Inatsisartut UPA 2024/159 akueraat: “Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 4/2023-mik Inatsisartut ilaliinissaannik siunnersuut: Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa nunani avannarlerni efterskolit akornanni suleqatigiinnerup annertusineqarnissaanut periarfissat misissoqqullugit, tassungalu ilanngullugu atuartut efterskolimiinnermut aningaasanik qinnuteqaateqarsinnaanissamut periarfissaat misissoqqullugit.”

Taamaalilluni siunnersuutip uuma UPA 2024/159-imik aalajangerneq malikkaa takuneqarsinnaavoq. Islandimi efterskolersinnaaneq massakkut periarfissaanngilaq, tassami Islandimi efterskoleqanngimmat. Taamaattumik Islandimi efterskolinik pilersitsisoqassappat, Islandimi efterskolernissamik tapiissutit periarfissat eqqartoqqinneqarsinnaalissapput.

Eqqaaneqareersutuulli Danmarkimi fagskolini namminersortuniinnermut tapiissuteqarsinnaanerit inatsisitigut tunngaviinik pilersitsinissaq aamma siunertaavoq. Fagskolit namminersortut tassaapput efterskolituulli nerisaqarfiutigaluni atuarfiusut, taamaattorli suliassatigut imaluunniit assaat atorlugit suliaqarfiunerusarnertik immikkoorutigaat taamaalillutillu atuartunut atuagarsornikkut piginnaasaqarpallaanngitsunut taakkunaniinnissaq periarfissaasinnaassalluni. Fagskolini namminersortuniinnerup atuartup nammineq nuannarisaminik inuussutissarsiummik imaluunniit inuusuttut ilinniagaannik,

assassorluni ilinniagaqalernissaminut imaluunniit suliffeqalernissaminut piareersarneqarnissaa siunertaraa taamaalillunilu iluatsittumik inuuneqalersinnaaneq aamma siunertaalluni.

Taamatut oqaaseqarlunga siunnersuut Inatsisartunut suliarineqartussanngorlugu tunniuppara.